



Kamis, 21 Januari 2021

Ogen: Jeremia 43:1-13



Ulih La Megiken Kata



Maun kita manusia tetapen ukurta ernalem man si teridah asangkan si la teridah. Enda me si ilakoken Panglima perang Juda paksa Jeremia erdahin. Adi nina Jeremia maka ula ernalem man bangsa Mesir tapi tetap tading i negeri Juda. La tek bangsa, sada pe la ia megiken Kata Jeremia si rehna i bas Dibata nari, iusur-usurna sura-surana. Erdandaken sie maka la banci la kena ukumen ia, lit si mate i bas perang, lit si kena penakit, ras lit si kelihen.

Si eteh ras si gejak maka kita pe megati kal nge lit turah perubaten i bas pusuhtha. Sada dampar ipindo kita erkiniteken man Tuhan kai pe si terjadi. Tapi ibas dampar si deban lebih tetap ukurta erpenalem man gegeh si tangkas si idah asangkan man Dibata si la minter maun teridah ras tergejak kai janji-janjiNa. Umpamana, adi ikut tes CPNS anakta maun lebih tetapen ukurta adi lit deking, si banci nampati ras duit-duiti asangkan ertoto kita mindo penampat man Dibata gelah ia lulus.

Arah Kata Dibata enda maka ibabai kita erkiniteken man Dibata, janah ibas erkiniteken e la banci setengah-setengah. Arus totalitas kegeluhenta. Tek man Dibata la perlu tawar menawar. La pe bagi ukur ntah la terterima perukurenta i je me intina erkiniteken (bdk. Heb.11:1) Tek nandangi si la teridah, tek nandangi si iarapken kita. Si nen dengen usihlah si Nuah. Situhuna la kal masuk akal perintah Tuhan erban kapal i datas deleng tapi patuh kal ia nandangi kai nina Tuhan man bana. Kita pe bage me i bas erkiniteken. Kai nina Dibata arah kataNa ikutken saja. La mungkin bene kalak si megiken pedah Dibata, sebab pedahNa maba keselamatan ras kegeluhen man banta kerina. Mari sibegiken ras sidalanken pedah Dibata. Ketuahen me kalak si megiken ras ndalanken kata Dibata.

Erkiniteken man Tuhan la perlu tawar menawar